

Memorandum SSU sudah diserahkan kepada JKNC

UB 13.11.2012 A2

KOTA KINABALU: Gabungan Majlis Presiden dan Setiausaha Kehormat Kesatuan Kakitangan Universiti Malaysia (Gakum), Persatuan Pentadbir Universiti dan Persatuan Akademik Universiti telah menyediakan menyerahkan memorandum Skim Saraan Universiti (SSU) kepada Mesyuarat Jawatankuasa Naib-naib Canselor (JKNC) untuk dibawa kepada Kementerian Pengajian Tinggi.

Pengerusi Gakum, Datuk Omar Osman berkata memorandum itu telah diserahkan kepada JKNC pada 23 Oktober lalu dan diharapkan perlaksanaan SSU itu dapat direalisasikan

pada tahun 2013 atau 2014.

“Skim ini diperlukan supaya setiap universiti mempunyai satu sistem kenaikan pangkat, latihan dan gred gaji yang lebih baik serta seimbang dengan peranan universiti pada hari ini khususnya yang sudah dinaik taraf ke status Universiti Penyelidikan.

“Skim ini merangkumi semua peringkat akademik, pentadbiran dan kumpulan pelaksana dalam universiti,” katanya kepada sidang media yang diadakan sempena Mesyuarat Gakum di sini kelmarin.

Omar berkata, dulu universiti tidak mempunyai pelajar dari luar negara tetapi kini sebaliknya dan terdapat

enam buah universiti yang sudah dinaik taraf. Malaysia harus mempunyai skim terbaik ini sebagai manayang berlaku di negara-negara maju yang lain.

Katanya, SSU itu diambil daripada penambahbaikan Skim Saraan Malaysia (SSM) tetapi lantikan daripada kelulusan Penilaian Menengah Rendah (PMR) adalah terkecuali.

“Kita juga mengambil Dasar Pemisah di bawah SSU ini dan kita mencadangkan dua peringkat iaitu mereka yang prestasi rendah (di bawah markah 60) selama tiga tahun dicadangkan bersara awal, manakala yang cemerlang, berpotensi tetapi jawatan terhad dibenarkan

menjawat jawatan yang lebih tinggi di universiti yang lain.

“Seseorang itu juga dibenarkan kembali ke universiti asal dengan jawatan tingginya pada suatu hari nanti.

“Keadaan ini boleh menjadikan penjawat awam itu bertaraf dunia...kini gaji yang diberikan maksimum 10 tahun, pangkat pula tidak naik tapi mahu orang bekerja seperti bertaraf dunia,” katanya.

Sementara itu, Omar juga mahu enam universiti yang dinaikan taraf kepada Universiti Penyelidikan mempunyai sedikit perbezaan daripada universiti lain.

Katanya, penaiktarafan universiti itu sudah pasti akan menambah beban penyelidikan, pelajar dan pelajar luar negara.

“Kita cadangkan universiti ini mempunyai satu insentif khas kepada kakitangan akademik sejumlah RM1,200, kakitangan pentadbiran RM800 dan kumpulan pelaksana RM500.

“Kita tidak menuntut perkara ini pada dua tiga tahun kebelakangan ini kerana kita masih dalam proses kajian dan kini selepas kajian itu, kami mendapati kakitangan awam universiti berkurangan tetapi beban bertambah.

“Jadi insentif khas ini perlu

dibagi supaya seimbang dengan beban di samping meningkatkan produktiviti, lebih bersemangat agar universiti bertaraf penyelidikan ini betul-betul mencapai kejayaan,” katanya.

Tambahnya, di seluruh Malaysia terdapat lebih kurang 30 ribu kumpulan akademik, 55 ribu kumpulan pelaksana dan 1,200 kumpulan pentadbiran.

UMS menjadi tuan rumah kepada mesyuarat Gakum kali ini yang mana sebanyak 18 institusi pengajian tinggi awam yang hadir daripada jumlah 20 buah bagi membincangkan hal-hal berkaitan dengan penjawat awam IPTA.